

DEO OPTIMO MAX.

UNI ET TRINO.

VIRGINI DEI-PARÆ, ET S. LUCÆ,

Orthodoxorum Medicorum Patrono.

BIB. Santé
Médecine
Paris

QUÆSTIO MEDICA

CARDINALITIIS DISPUTATIONIBUS

*manè discutienda in Scholis Medicorum, die Jovis vigesima-nonâ
mensis Martii, anno Domini M. DCC. LXXXVII.*

M. JOANNE-JACOBO NOLLAN, Mⁱ. PETRI-JOANNIS-
CLAUDII MAUDUYT DE LA VARENNE vices gerente,
Doctore Medico, Præsîde.

*An in nullâ aëris temperie sanitati fovendæ magis conducat exercitium, quam in
humidâ.*

I.

AER in lucem editis necessarium est vitæ pabulum. Si quis illius usa
oratur, angitur illicò, & ne paucis quidem momentis vitam servare
potest. Quin immò, nisi sæpiùs renovetur, ex ipso respirationis opere & insen-
sili corporis exhalatione tam depauperatur & inquinatur, ut ad vitam sufficere
nedum valeat, immò noxius fiat aut lethalis; quod probatur exemplo animalium
sub campanulâ vitreâ inclusorum. Hæc brevi pereunt, nisi ipsis cum aëre ex-
terno commercium restituatur. Multiplici viâ corpus nostrum ingreditur aër; asperâ
arteriâ ad pulmonem tendit, œsophago deferitur ad ventriculum, & ad intimos
usquè recessus penetrat. Sanguini cœterisque humoribus immiscetur, perfectum-
que affectat æquilibrium cum aëre corpus externè ambient. Si hujus actio tan-
tispermè imminuitur vel augetur, indigena corporis aër statim sese explicat vel
comprimitur, & sanguinem ad affectandum majus aut minus spatium compellit.
Sic externa corpori incumbens atmosphæra, interni aëris liquoribus immixti vim
elasticam pressione suâ moderatur & regit. Sic magis minùs-ve compacti humo-
res faciliùs aut difficiliùs sua vasa percurrunt. Igitur consideratio aëris inter ea quæ
sanitati fovendæ conducunt non infimum locum sibi vindicat. Respiratio, transpira-
tio, cœteræque functiones & excretiones absquè illius concursu ritè se habere
nequeunt. At in aëre externo variæ sunt mutationes ex quibus diversi produ-
cuntur effectus pro variâ earum naturâ. Illæ sunt quæ in illius gravitate, elatere,
calore, frigore, siccitate, humiditate sese produnt, vel in partibus magis aut
minùs heterogeneis è minerali, vegetali & animali regno depromptis, quibus
fœtus est & impregnatus aër. Verùm quinam sint harum-ce mutationum effec-
tus, & in quânam ex his aëris constitutionibus sanitati fovendæ magis condu-
cit exercitium? Hoc perpendendum incumbit.

* *Traité de
Météorologie,
pag. 479.*

* A tali
causâ originem
duxit morbus
qui grassatus
est in paro-
chiam de
Stains, anno
1778, & à
paucis annis
in parochiam
Argentuil.

* In exem-
plum veniunt
parochia de
*Fontenay sous
Louvres*, anno
1773; paro-
chia de *Vemars*
anno 1775;
parochia du
Tremblay anno
1776 & annis
1785 & 1786,
parochia dicta
des Vertus.

GRAVITATE & elasticitate corpus nostrum undiquè premit aër. Hæ pressio longè major est quàm vulgò creditur. Æqualis est ponderi columnæ mercurii cujus altitudo ad 28 pollices excurreret, basis verò superficiem corporis adæquaret; undè, inito calculo, pondus aëreæ molis suprà corpus staturæ mediæ æquat 31500 libras*. Pondere hoc immenso corpus obrueretur, nisi undiquè circumfusa premeret æqualitèr atmosphæra, & aëris in omnibus corporis partibus contenti nisu continuo æquilibraretur. Verùm non eadem est semper in subjecta corpora aëris pressio; insignis sæpè aërei ponderis diversis locis, diversisque temporibus observatur & ex mercurii altitudine in Barometro mensuratur varietas. Hac perturbato aërem externum intèr & internum æquilibrio, illius diversâ in cutim actione, diversæ fiunt in fluidis alterationes, in solidis mutationes. His diversi generantur morbi, quandòque ii qui populares vel epidemici vocantur. Gravitatis & elasticitatis aëreæ varietas & actio desumuntur ex heterogeneis partibus quibus impregnatur atmosphæra, ex motu hujus variato, sive ex ventis, ex calore, frigore, siccitate & humiditate. Hæ aëris qualitates, constitutiones fuerunt vocatæ. Aërem infici variis emanationibus pro locorum naturâ, pro corporibus mineralis, vegetalis aut animalis regni in illis latitantibus, quis ignorat? Hæ partes heterogeneæ aëre innatantes pro eorum diversâ indole benignos aut malignos effectus producant. Hinc Hippocrates aërem vitæ morborumque causam esse dixit. Nullibi aër magis foetus est partibus heterogeneis & noxiis, quàm in vicinio aquarum stagnantium*, in locis humilibus, & ubicumquè nequit renovari.

A variis etiam ventis afferuntur partes heterogeneæ pro locis à quibus flant & quos peragrant. Sic venti septentrionales in regione nostrâ vulgò sunt frigidi, quippè è locis minùs calefactis spirantes congelatos vapores secum vehunt. Australis ventus vulgò calidus est, utpotè è regionibus calidis proveniens. Orientalis moderatè calidus est & siccus, quippè è locis antea sole fotis provenit, & peragrat terras ubi nulla ferè maria existunt. In genere est saluberrimus. Occidentalis tandè humidus est, & imbres largas secum afferre solet, exurgit enim ex Oceano.

Varii etiam motus fiunt in aëre quæ dicuntur *fluenta*, quibus heterogeneæ partes abripiuntur, ferunturque in loca in quibus præ eorum situ fluentorumque directione, hærent, & ibi producant morbos, salvis omnibus locis adjacentibus. Sic sæpè apparet morbus popularis in unâ parochiâ*; salvis parochiis circumjacentibus, licet incolarum idem sit laboris genus, vivendique norma.

I I I.

NEC tantum ex diverso gravitatis & elasticitatis aëris gradu, ex variis ventis, ex partium heterogenearum naturâ salubris est vel insalubris aër; sed etiam ex calore, frigore, siccitate, humiditate.

Nulla aëris temperies corpus vivens sensibilius afficit, quàm calor & frigus. Quidquid est infra actualem corporis calorem, frigidum; quidquid est suprà, calidum sentitur & nuncupatur. Calor aërem rarefacit, imminuit hujus gravitatem, ergo pressionem. Hinc quâ proportionem calidus sit aër externus, eadem adaugetur interni vis elastica, rarefiunt humores, respirationis opus minùs rite adimpletur, laboriosa fit hæc functio, difficiliorque sanguinis & humorum circuitus, undè lassitudines, debilitates quas experimur dum perdurant fervores æstivi. Insupè calore patentiores fiunt cutis meatus, adaugetur insensibilis exhalatio, qui remanent humores viscidi fiunt, avolatâ eorum parte fluidiori, circulationique obundæ minùs idonei. Si accedat humiditas, vis elastica aëris humoribus indigena

pressione aëris externi minùs adhùc æquilibratur. Humiditate relaxantur solida, debiliùs agunt in humores, hi lentescunt, congeffiones efficiunt; intrà partes illorum per vim aëris interni elasticam fit diductio, dissolutio, putrefactio. Hinc ista temperies quæ à Sydenhamo & aliis vocatur tepida, insalubris maximè & perniciofa jurè ac meritò ipsis videtur.

A frigore condensatur aër; major ergo est ipfius vis elastica & pressio in superficiem corporis. Qui fluidis est indigena magis comprimitur; undè magis compacti humores. Præterea frigore solidorum vis in fluida crescit, respirationis munus, auctâ aëris gravitate & elatere, faciliùs adimpletur, promoveretur humorum circuitus, functionesque alacriùs fiunt. Verùm si frigus fit minùs intensum, humores partim figit, partim ab ambitu retrò ad interiora urget agendo in cutim, cujus exquisitus est sensus, eamque spasmodicè constringendo, quæ avolare debebant effluvia retinentur, vel eorum pars tantùm fluidissima abripitur, undè sanguinis & humorum acrimonia, spissitudo inflammatoria.

I V.

SICCITAS & humiditas sunt aëris temperies maximè sensibus obviæ. In genere constitutio sicca est omnium saluberrima. Aër enim minùs à naturâ suâ recedit, quippè minori emanationum quantitate impregnatur, magis servat æquilibrium cum aëre in humoribus existente, ad respirationem magis est idoneus bronchia & vesiculas amplius porrigendo ac distendendo, undè liber sanguinis circuitus, humorumque excretio & secretio. Si siccitas sit calidior, vias respirationis exsiccat, mobiliora dissipat, residua crassa efficit. Si sit frigidior, fibræ tonum adauget, illius oscillationes frequentiores & fortiores efficit; contrahendo cutis poros transpirationis partem tantùm fluidiorem elabi finit. Undè morbi inflammatorii.

Ex omnibus constitutionibus insaluberrima est humida. Quò magis pluviosus est aër, eò magis à statu perfecto recedit, eò minùs potest æquilibrare aërem in humoribus contentum, respirationis officio favere, imminato illius gravitate & elatere, laxatisque tum pulmonum, tum corporis peripheriæ fibris; undè motu lentiori donantur humores, transpiratio minùs ritè succedit, noxia accumulantur; motus intestinus in sanguine & in humoribus ab aëris elatere in ipsis inclusi nascitur, quo ad dissolutionem scorbuticam, putredinemque tendunt. Hinc morbi a pituitosâ & glutinosâ colluvie oriundi, ut vertigines, cachochymia, catarrhi pituitosi, oedemata, febres putridæ, scorbuticæ, scorbutus. Hinc tot morbi populares in parochiis quarum incolæ vitam degunt in ædiculis depressis, propè latrinas, fimeta cavædiis inclusa, putridum vaporem exhalantia; quæ ædícula præ fenestrarum angustis & sæpè defectu, aëreis fluentis nequeunt mundari. Si humiditati accedat calor; quæ paragrapho præcedenti à temperie tepidâ oriri retulimus, patrantur mala. Si frigus, particulæ aqueæ meatibus perspirationis arctiùs solitò applicantur, poros cutis & pulmonum arctant, & occludunt, insensilis exhalationis exitum, perfectumque respirationis opus impediunt, undè plurima noxia retinentur in corpore, undè febres putridæ catarrhales, catarrhi, peripneumonix nothæ, rheumatici dolores, &c.* Nunc in quam ex his constitutionibus sanitati magis conducit exercitium?

V.

SANGUINEM & humores cordis & arteriarum actione moveri notum est. Verùm hæc actio sola si vitæ conservandæ sufficit, sanitati fovendæ imparem esse, nisi idoneum accedat exercitium, quotidiana probat experientia. Sic qui vitam inexercitati degere coguntur, graves, cachochymici fiunt, ipsique mox pedes & crura tument. Ab exercitio ritè instituto magna ad sanitatem

* Tales fuerunt morbi, qui generatim grassati fuerunt anno 1776.

4

exurgunt commoda ferèque univèrsa constituitur Medicîna. Musculorum motu sanguinis circuitus insensibilisque exhalatio non parùm promoveatur, calor nativus suscitatur, perficitur sanguificationis opus, pravorum succorum collectiones præcaventur. Exercitium sanguinis & humorum motum per vasa promovendo impedit ne quid nocituri miasmatis ab aëre in sanguinem irreat, vel si quid jam commixtum est, feliciter nonnunquam expellit. Hinc quot morbos vario medicamentorum apparatu dudum & frustra tentatos, exercitio curatos fuisse observatio & experientia comprobant. Verùm quoquo modo & ubicumque fiat exercitium, in aëre semper & ubique nos ambiente fit, & ritè institutum ad sanitatem conducit; sed magis aut minùs pro diversâ aëris temperie.

In calidâ moderatè & siccâ, naturalis solidorum tonus & vis in fluida conservatur, undè sanguinis circuitus insensibilisque exhalatio, quibus tam necessarius est motus, ritè fiunt. Si calidior fit constitutio, rarefactis humoribus vasorum parietes distrahuntur, notha plethora molestat, difficilis per pulmonem sanguinis transitus, laboriosa respiratio, undè motus in hac constitutione moderatus conducit, at periculosus esset, si paulò intenderetur; quippè per exercitium paulò intensum accelerato sanguinis motu, eo pulmones obruerentur, undè suffocationis immineret periculum. In frigidâ moderatè & siccâ, respiratio fit facilè, auctâ aëris gravitate & elatere; solidorum vis crecit, undè validior circulatio, perfectior humorum elaboratio & secretio, minus ergo requiritur exercitium. At si frigus intenditur, solidorum vis in fluida major fit, cutis pori spasmodicè contriunguntur, pars tantùm fluidior ab humoribus abripitur, unde timenda spissitudo inflammatoria. Igitur exercitium in illâ temperie cautè adhibendum. In humidâ solidorum tonus & actio, interpositis intrâ ipsorum poros partibus aqueis, minuitur, languet humorum circuitus, transpiratio & respiratio minùs ritè adimplentur. Quibus majori quantitate in istâ constitutione foetus est aër, emanationes faciliùs subeunt sanguinis oceanum. Si calida, magis timenda est, ut antea dictum fuit. Si frigida, partes aqueæ orificiis ductuum transpirationis arctiùs applicantur, illius exitum impediunt, undè plurima nascuntur mala, quæ paragrafo præcedenti retulimus. Verùm exercitium solida roborat, circulationis motum & transpirationem adauget. Quæ irreperunt intrâ fibrarum poros, aqueas partes, vel quæ sanguinis oceanum ingressa sunt, miasmata, expellit. Solidis actionem, humoribus fluiditatem, appositamque elaborationem conciliat. Pravos ergo humidæ constitutionis effectus emendat & extirpat exercitium. Nullus est humiditatis gradus, in quo feliciter ad sanitatem adhiberi possit, sed idem dici non potest in aliis constitutionibus, ut modò probavimus:

Ergo in nullâ aëris temperie sanitati fovendæ magis conducit exercitium, quàm in humidâ.

Proponebat Parisiis, JOANNES-BAPTISTA-CAROLUS ASSELIN, Abrincensis, Doctor Medicus Cadomensis, nec-non Saluberrimæ Facultatis Medicinæ Parisiensis Baccalaureus, Theseos Auctor.

A. R. S. H. 1787. AB OCTAVA AD MERIDIEM.



Typis QUILLAU, Universitatis & Facultatis Medicinæ Typographi, viâ dictâ du Fouarre, 1787.